



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu kazu violénsia bazeia ba jeneru – WCJU

Tribunál Distritál Dili no Oe-cusse

Outobru 2015

A. Sumáriu prosesu julgamentu kazu iha Tribunál Distritál Dili no Oe-cusse- Períodu Outobru 2015

1. Totál kazu ne'ebé monitoriza = kazu 11

Tipu Kazu	Númeru
Artigu 145 & LKVD Ofensas simples natureza violénsia doméstika	10
Artigu 145 Ofensas simples	0
Artigu 172 Violausaun seksuál	1
Artigu 177(1) Abuzu seksuál ba menór, ho prátika koitu	0
Totál	11 kazu

2. Totál desizaun ne'ebé JSMP/WCJU monitoriza = kazu 11

Tipu desizaun	Númeru
Suspensaun ba pena prizaun tuir Artigu 68 Kódigu Penál	9
Pena prizaun ho dever seluk (indemnizasaun)	1
Pena multa tuir artigu 67 Kódigu Penál	1
Homologu	-
Absolve	-

Suspensaun ba pena prizaun ho devér tuir Artigu 69 husi Kódigu Penál	-
Suspensaun ba pena prizaun ho regra ba konduta tuir Artigu 70 husi Kódigu Penál	-
Suspensaun ba pena prizaun ho akompañamentu tuir Artigu 71 husi Kódigu Penál	-
Admonestasaun tuir Artigu 82 husi Kódigu Penál	-
Pena multa ho obrigasaun hodi hetan tratamentu ka akompañamentu tuir Artigu 38.2 husi LKVD	-
Totál	11 kazu

3. Totál kazu sira ne'ebé adia = -

Razaun ba adiamentu	Númeru
Parte sira la marka prezensa	-
Atór judisiáriu la marka prezensa	-
Totál	-

B. Deskripsaun ba desizaun kazu sira

1. Krime ofensa ba integridade física simples ho forma violénsia doméstika

Nú. Prosesu : 0430/12. DICMR
 Kompozisaun tribunál : Singular
 Juis :Dr. Jose Esqurial (juis estajiáriu)
 Ministériu Públiku :Dr. Pedro Baptista (prokurador estajiáriu)
 Defeza :Dr. Marçelino Marques colo (defensória públiku)
 Tipu desizaun :Pena multa US\$60.00

Iha 1 Outubru 2015, Tribunál Distritál Dili julga krime violénsia doméstika ne'ebé involve arguidu ABS hasoru nia feen, iha Distritu Dili.

Ministériu Públiku akuza katak, iha 20 Novembru 2012, tuku 14:00 lokraik, arguidu ho lezada diskuti malu tanba arguidu diskonfia lezada ba mane seluk. Tanba ne'e arguidu tuku dala 2 iha lezada nia matan fukun, tebe dala 1 iha lezada nia kanotak no tebe tan dala 1 iha lezada nia ain, no rezulta bubu iha lezada nia matan fukun no sente moras iha ain.

Ministériu Públiku akuza arguidu kontra artigu 145 Kódigu Penál kona- ba ofensa ba integridade física simples konjuga ho artigu 35 Lei Kontra Violénsia Doméstika.

Iha tribunál, arguidu konfesa integralmente ba faktus iha akuzasaun, arguidu mós deklara katak arepende ninia hahalok no depoisde akontesementu sira diak malu kedas. Tanba arguidu konfesa, ministériu públiku husu ba tribunál la presija rona tan deklarasaun lezada.

Iha alegasaun final, ministériu públiku haktuir katak arguidu konfesa faktu sira no arepende nia hahalok, tanba ne'e husu ba tribunál atu kondena arguidu ho pena prizaun tinan 1 suspende ba tinan 1.

Entertantu defeza haktuir katak, depoisde akontesementu arguidu ho lezada rejolve ona problema ne'e, arguidu arepende ona nia hahalok no foin primeiravez komete krime, tanba ne'e husu ba tribunál atu aplika pena ne'ebé adekuadu.

Depoisde tribunál avalia faktus provadus sira ne'ebé produz durante julgamentu, iha 5 Outobru 2015, tribunál konklui prosesu ne'e no kondena arguidu ho pena multa US\$60.00 no selu kusta judisiáriu US\$10.00.

2. Krime ofensa ba integridade fízika simples ho forma violénsia doméstika

Nú. Prosesu : 0015/15.PDDIL
Kompozisaun tribunál : Singular
Juis : Dr.Antoninho Helder do Carmo
Ministériu Públiku : Dr.Bartolomeu Diaz
Defeza : Dr. Marçelino Marques colo (defensória públiku)
Tipu desizaun : Kondena arguidu ho pena prizaun fulan 6 suspende ba tinan 1

Iha 8 Outobru 2015, Tribunál Distritál Dili julga arguidu BDN ne'ebé komete krime violénsia doméstika hasoru nia feen, iha Distritu Dili

Ministériu Públiku akuza kata iha 13 Janeiru 2015, arguidu husu sira nia oan mane no lezada hatan katak sai ho motor no seidauk fila. Tanba ne'e sira diskuti malu arguidu rasta lezada nia liman, halo lezada monu ba rai, arguidu tebe tan dala 1 iha lezada nia kabun no buti lezada nia kakorok. Aktu hirak ne'e rezulta lezada sofre moras iha lezada nia kabun no metan iha kakorok.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál arguidu konfesa integralmente faktus sira iha akuzasaun, Iha parte seluk lezada deklara katak ba faktus sira iha akuzasaun ne'e los hotu.

Iha alegasaun final, ministériu públiku haktuir katak faktus sira ne'e provadu hotu tuir konfisaun arguidu nian no konfirmasaun ba lezada. Tanba ne'e, atu halo prevensaun ba krime hanesan

labele akontese tan iha futuru, husu ba tribunál atu kondena arguidu ho pena prizaun fulan 3 suspenda ba tinan 1.

Entertantu defeza iha ninia konkluzau husu ba tribunál atu konsidera sirkunstansia atenuante arguidu nian hanesan konfesa, arepende no responsavel úniku ba familia. Tanba ne'e husu ba tribunál atu kondena arguidu ho pena ne'ebé kma'an.

Depoide avalia faktus provadus sira ne'ebé produz durante julgamentu, tribunál konklui prosesu ne'e no kondena arguidu ho pena prizaun fulan 6 suspende ba tinan 1.

3. Krime violasaun seksuál

Nú. Prosesu : 0100/14 /LIBZT
Kompozisaun tribunál : Kolektivu
Juis : Dra. Jumiaty Freitas, Dra. Jacinta Correia, Dr. Benjamin Barros
Ministériu Públiku : Dra. Remizia Fatima
Defeza : Dr. Marçal Mascarinhas
: Dr. Marçelino Marques Colo (defensória públiku)
Tipu desizaun : Kondena arguidu ho pena prizaun tinan 10 fulan 6 no selu
indemnizasaun US\$700

Iha 12 Outobru 2015, Tribunál Distritál Dili julga arguidu ZAB ne'ebé komete krime violasaun seksuál hasoru lezada CRB, iha Distritu Dili.

Ministeriu Públiku akuza arguidu kontra artigu 172 Kodigu Penál konabá violasaun konjuga ho artigu 23 Kodigu Penál konabá tentativa.

Depoide produsaun ba provas (rona deklarasaun arguidu, lezada no testamuña) tribunál bazeia ba artigu 274 Kodigu Prosesu Penál (KPP) kona-bá alterasaun ba kualifikasaun juridiku, tribunál altera kazu ne'e husi tentativa violasaun ba fali violasaun konsumadu tanbá arguidu prátika koitu orál.

Iha alegasaun final, ministériu públiku konkorda ho alterasaun ne'ebé mak tribunál halo tanbá iha deklarasaun lezada no testamuña nian hatudu katak arguidu provadu halo violasaun ho forma koitu orál hasoru lezada. Bazeia ba aletersaun ne'e husu ba tribunál atu kondena arguidu ho pena prizaun tinan 12.

Enkuantu defeza mantein ho akuzasaun ministériu públiku nian, no husu ba tribunál atu absolve arguidu tanbá faktus ne'ebé produs la sufisiente atu halo alterasaun no kondena arguidu.

Hafoin suspende minutu 15, tribunál kontinua ho leitura akordaun. Iha leitura akordaun ne'e tribunál konklui katak arguidu provadu obriga lezada prátika violasaun ho forma koitu orál hasoru lezada. Tribunál mós prova katak arguidu fakar esperma iha lezada nia isin lolon nune'e halo lezada laran sae no muta dala rua.

Bazeia ba provas ne'ebé produs no refere ba Konvesaun Internasionál CEDAW, tribunál konklui prosesu ne'e no kondena arguidu ho pena prizaun tinan 10 fulan 6 no selu mós indemnizasaun US\$700.

4. Krime ofensa ba integridade fízika simples ho forma violénsia doméstika

Nú. Prosesu : 0308/13.DIDIL
Kompozisaun tribunál : Singular
Juis : Dr. Benjamin Barros (juis estajiáriu)
Ministériu Públiku : Dr. Remizia de Fátima
Defeza : Dr. Françisco Caitano (defensória públiku)
Tipu desizaun : Pena prizaun fulan 6 suspende ba tinan 1

Iha 28 Outubru 2015, Tribunál Distritál Dili julga arguidu AXS ne'ebé komete krime violénsia doméstika hasoru nia ex-fee, iha Distritu Dili.

Ministériu Públiku akuza katak iha 1 Outobro 2013, maizumenus tuku 09:30 dadersan, ho motivu ne'ebé mak la klaru arguidu baku dala 1 iha lezada ain kabun no rezulta lezada sofre moras. Kazu ne'e akontese wainhira lezada ho ninia kolega sira buka hela ninia laen segundu ne'ebé la fila ba uma.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika

Iha tribunál, arguidu konfesa faktus sira iha akuzasaun, arepende ninia hahalok no promete katak sei la repete krime hasoru lezada iha futuru, no husu ona diskulpa ba lezada nia familia. Alende ne'e lezada kontinua reforsa akuzasaun husi ministériu públiku.

Iha alegasaun finál, ministériu públiku haktuir katak arguidu konfesa faktus, husu ona diskulpa, maibé tanbá arguidu mós antes ne'e komete ona krime seluk no hetan ona pena prizaun fulan 1, tanba ne'e ministériu públiku husu ba tribunál atu kondena arguidu ho pena trabalho a favor ba comunidade durante loron 60 nia laran.

Defeza husu ba tribunál atu konsidera sirkunstansia atenuante arguidu nian hanesan konfesa, arepende nia hahalok no husu ona deskulpa ba lezada ho nia familia, nune'e husu ba tribunál atu aplika pena ne'ebé adekua.

Depoizide tribunál avalia faktus provadus sira ne'ebé mak produz durante julgamentu, iha 9 Novembru 2015, tribunál konklui prosesu ne'e no kondena arguidu ho pena prizaun fulan 6 suspende ba tinan 1.

5. Krime ofensa ba integridade fízika simples ho forma violénsia doméstika

Nú. Prosesu : 0308/13.DIDIL
Kompozisaun tribunál : Singular
Juis : Dra. Ana Paula Fonseca
Ministériu Públiku : Dra. Ivonia Maria Guterres
Defeza : Dra. Marcia Sarmento (defensória públiku)
Tipu desizaun : Pena prizaun tinan 1 suspende ba tinan 2

Iha 29 Outobru 2015, Tribunál Distritál Dili julga arguidu MdS ne`ebé komete krime violénsia doméstika hasoru nia feen, iha Distritu Liquica.

Ministériu Públiku akuza katak iha 25 Setembru 2014, iha tuku 12.00 meudia, lezada husu osan ba arguidu atu fó ba nia maun sira halo lia. Tanba ne`e arguidu ho lezada diskuti malu no arguidu basa dala 2 iha lezada nia hasan, tuku dala 1 iha lezada nia kotuk laran, tebe dala 2 iha lezada nia ain, no rasta lezada ba rai no tu`ur iha lezada nia leten, no buti iha lezada nia kakorok. Aktu hirak ne`e rezulta lezada sofre kanek iha lezada nia kabas, liman sikun, no moras iha kotuk laran, ain no kakorok.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu konfesa integralmente faktus iha akuzasaun, deklara katak, depoisde akontesementu sira diak malu kedas, arguidu mós fo ona osan US\$50.00 ba lezada hodi halo tratamentu ba nia kanek, no arepende nia hahalok. Depoisde konfirma ho lezada kontinua reforsa faktu sira iha akuzasaun, maibé lezada mós deklara katak perdua ona arguidu.

Iha alegasaun final, ministériu públiku haktuir katak arguidu provadu komete krime hasoru lezada, tanba ne`e atu halo prevensaun ba krime hanesan labele akontese iha futuro, husu ba tribunál atu kondena arguidu ho pena prizaun tinan 1 suspende ba tinan 2.

Entertantu defeza husu ba tribunál atu konsidera sirkunstansia atenuante sira, hanesan arguidu konfesa, arepende nia hahalok, primeiraves komete krime, fo ona indemnizasaun ba lezada no responsabiliza ba nia familia, tanba ne`e husu ba tribunál atu fó pena ne`ebé kaman ba arguidu.

Depoisde avalia faktus provadu sira ne`ebé produz durante julgamentu, tribunál konklui prosesu ne`e no kondena arguidu ho pena prizaun tinan 1 suspende ba tinan 2.

6. Krime ofensa ba integridade fízika simples ho forma violénsia doméstika

Nú. Prosesu : 165/krime/2015/TDO
Kompozisaun tribunál : Singular
Juis : Dr. João Ribeiro
Ministériu Públiku : Dra. Ambrosio Rangel Freitas
Defeza : Dr. Afonso Gomes Fatima (defensória públiku)
Tipu desizaun : Kondena arguidu ho pena prizaun tinan 1 suspende ba tinan 2

Iha 23 Outubru 2015, Tribunál Distritál Oe-cusse julga arguidu LC ne`ebé komete krime violénsia doméstika hasoru nia feen, iha Distritu Oe-cusse.

Ministériu Públiku akuza katak iha 30 Abril 2015, maizumenus iha tuku 07.00 dader, lezada haruka arguidu atu lori kartaun eleitoral ba sede suku hodi trata bolsa da mae ba sira nia oan. Maibé arguidu lakohi no haruka fali nia alin, tanba ne`e sira diskuti malu arguidu buti iha lezada nia kakorok no foti katana ameasa atu taa lezada, maibé lezada la hatan ka la halo reasaun tanba sofre difisiente iha nia ain.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples no artigu 157 Kódigu Penál kona-ba krime ameasa konjuga ho artigu 35 Lei Kontra Violénsia Doméstika.

Tribunál halo tentativa konsiliaaun ba krime ameasa no lezada rasik hakarak atu deziste kazu ne`e no arguidu mós konkorda.

Iha alegasaun final, ministériu públiku husu ba tribunál atu halo dezistensia ba krime refere tanba ministériu públiku laiha ona legitimidade no husi parte defeza aseita ho alegasaun ne`e, tuir mai tribunál konklui hodi omologa kazu krime ameasa ne`e.

Enkuantu relasiona ho kazu violénsia doméstika, arguidu, konfesa totalmente faktus sira ne`ebé deskreve iha akuzasaun. Tanba ne`e tribunál husu ba ministériu públiku no defeza atu la presija rona tan lezada nia depoimentu.

Iha alegasaun final, ministériu públiku haktuir katak tanba lezada nu`udar difisiente, tanba ne`e husu ba tribunál atu kondena arguidu ho pena prizaun fulan 6. Entertantu defeza husu ba tribunál atu fó justisa ba arguidu.

Depoizde avalia faktus provadus sira ne`ebé mak produz durante julgamentu tribunál konklui prosesu ne`e no kondena arguidu ho pena prizaun tinan 1 suspende ba tinan 2.

7. Krime ofensa ba integridade fizika simples ho forma violénsia doméstika

Nú. Prosesu	: 169/krime/2015/TDO
Kompozisaun tribunál	: Singular
Juis	: Dr. João Ribeiro
Ministériu Públiku	: Dra. Ambrosio Rangel Freitas
Defeza	: Dr. Calisto Tout (defensória públiku)
Tipu desizaun	: Kondena arguidu ho pena prizaun tinan 1 suspende ba tinan 1 fulan 6

Iha 26 Outubru 2015, Tribunál Distritál Oe-cusse julga arguidu DLT ne`ebé komete krime violénsia doméstika hasoru nia feen, iha Distritu Oe-cusse.

Ministériu Públiku akuza katak iha 09 Jullu 2015, arguidu haruka lezada atu suru etu ba nia han maibé lezada ba fali toba. Tanba ne`e sira diskuti malu arguidu basa dala 1 iha lezada nia hasan karuk, tuku dala 1 iha kanuruk, foti fatuk tuda iha lezada nia kanotak no kabas. Aktu hirak ne`e rezulta sofre moras, bubu, mean iha parte ne`ebé hetan tuku no tuda husi arguidu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Kontra Violénsia Doméstika. Kazu ne`e aneksa mós ho relatóriu médiku husi Postu Saude Malelat.

Iha tribunál, arguidu konfesa totalmente faktus sira ne`ebé deskreve iha akuzasaun. Tanba ne`e tribunál husu ba ministériu públiku no defeza atu la presiza rona tan lezada nia depoimentu.

Iha alegasaun finál, ministériu públiku haktuir katak arguidu provadu komete aktu hirak ne`e hasoru lezada, no krime violénsia doméstika mak númeru bo`ot liu iha Oe-cuss. Tanba ne`e husu ba tribunál atu kondena arguidu ho pena prizaun tinan 1 suspende ba tinan 1 fulan 6. Enkuantu defeza husu ba tribunál atu fó pena ne`ebé adekuaudu ba arguidu.

Depois avalia faktus provadus sira ne`ebé produz durante julgamentu tribunál konklui prosesu ne`e no kondena arguidu ho pena prizaun tinan 1 suspende ba tinan 2.

8. Krime ofensa ba integridade fizika simples ho forma violénsia doméstika

Nú. Prosesu	: 158/krime/2015/TDO
Kompozisaun tribunál	: Singular
Juis	: Dr. João Ribeiro
Ministériu Públiku	: Dra. Ambrosio Rangel Freitas
Defeza	: Dr. Afonso Gomes Fatima (defensória públiku)
Tipu desizaun	: Kondena arguidu ho pena prizaun fulan 6 suspende ba tinan 1

Iha 27 Outubru 2015, Tribunál Distritál Oe-cusse julga arguidu MB ne`ebé komete krime violénsia doméstika hasoru nia feen, iha Distritu Oe-cusse.

Ministériu Públiku akuza katak iha 9 Jullu 2015, bainhira lezada fila husi kompras iha merkadu, arguidu mós to`o iha uma ho kondisaun lanu. Tanba ne`e sira diskuti malu no arguidu basa dala ida iha lezada nia hasan karuk, rezulta lezada nia hasan karuk moras, bubu no mean.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho Lei Kontra Violénsia Doméstika. Kazu ne`e hetan relatóriu médiku husi postu Saude Pune no foto-grafia.

Iha tribunál, arguidu konfesa totalmente ba faktus hotu iha akuzasaun, arepende ba nia hahalok, tanba ne`e, tribunál husu ba ministériu públiku atu la presiza rona tan deklarasaun husi lezada.

Iha alegasaun finál, ministériu públiku konsidera katak faktus hotu provadu, tanba ne`e husu ba tribunál atu kondena arguidu ho pena prizaun fulan 6 suspende ba tinan 1. Enkuantu defeza husu ba tribunál atu kondena arguidu ho pena ne`ebé kaman.

Depoisde avalia faktus provadus ne`ebé produz durante julgamentu, tribunál konklui prosesu ne`e no kondena arguidu ho pena prizaun fulan 6 no suspende ba tinan 1.

9. Krime ofensa ba integridade fízika simples ho forma violénsia doméstika

Nú. Prosesu : 158/krime/2015/TDO
Kompozisaun tribunál : Singular
Juis : Dr. João Ribeiro
Ministériu Públiku : Dra. Ambrosio Rangel Freitas
Defeza : Dr. Afonso Gomes Fatima (defensória públiku)
Tipu desizaun : Kondena arguidu ho pena prizaun fulan 6 suspende ba tinan 1

Iha 27 Outubru 2015, Tribunál Distritál Oe-cusse julga arguidu FB ne`ebé komete krime violénsia doméstika hasoru nia feen, iha Distritu Oe-cusse.

Ministériu Públiku akuza katak iha 20 Juñu 2015, maizumenus tuku 09.00 dader, arguidu husu ba lezada kona-ba modo na'an iha sanan arguidu ho se mak atu han no lezada lahatan. Tanba ne`e sira diskuti malu no arguidu tebe iha lezada nia kanuruk parte los dala 2 no halo lezada monu ba rai. Aktu hirak rezulta lezada sofre bubu no mean no moras iha lezada nia kanuruk.

Ministériu Públiku akuza arguidu kontra artigu 145 hosi Kódigu Penál kona-ba ofensa ba integridade fizika simples konjuga ho Lei Kontra Violénsia Doméstika. Kazu ne`e mós aneksa ho relatóriu médiku husi Pradet no foto-grafia husi PNTL-VPU.

Iha tribunál, arguidu konfesa totálmente faktus sira iha akuzasaun, arepende nia hahalok no deklarata katak sei la repete hahalok hanesan hasoru lezada. Aleinde ne`e lezada mós kontinua reforsa akuzasaun husi ministériu públiku.

Iha alegasaun finl, ministériu públiku haktuir katak atu halo prevensaun jerál ba krime violénsia doméstika iha uma laran, husu ba tribunál atu kondena arguidu ho pena prizaun tinan 1 suspende ba tinan 1 fulan 6.

Enkuantu defeza haktuir katak arguidu konfesa faktus sira hotu, kolabora diak ho tribunál, arepende nia hahalok, tanba ne`e husu ba tribunál atu fó pena ne`ebé kaman ba arguidu..

Depoisde avalia faktus provadus sira ne`ebé produz durante julgamentu, tribunál konklui prosesu ne`e no kondena arguidu ho pena prizaun fulan 6 suspende ba tinan 1.

10. Krime ofensa ba integridade fízika simples ho forma violénsia doméstika

Nú. Prosesu : 166/krime/2015/TDO.
Kompozisaun tribunál : Singular

Juis : Dr. João Ribeiro
Ministériu Públiku : Dra. Ambrosio Rangel Freitas
Defeza : Dr. Afonso Gomes Fatima (defensória públiku)
Tipu desizaun : Kondena arguidu ho pena prizaun tinan 1 suspende ba tinan 2

Iha 28 Outubru 2015, Tribunál Distritál Oe-cusse julga arguidu GC ne`ebé komete krime violénsia doméstika hasoru nia feen, iha Distritu Oe-cusse.

Ministériu Públiku akuza katak, iha 15 Juñu 2015, maizumenus iha tuku 20.00 kalan, arguidu ho lezada diskuti malu tanba lezada ba ajuda nia alin koa hare la fo hatene ba arguidu. Arguidu kaer lezada nia liman kabun hosi parte karuk no dulas to`o oin halai no kona didin lolon. Lezada nia kanotak baku iha didin lolon no ain tur kona iha rai nune`e rezulta moras, bubu, mean no hetan kanek iha ain tur.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho Lei Kontra Violénsia Doméstika. Kazu ne`e hetan relatóriu médiku no foto grafia husi Pradet Oe-cusse.

Iha tribunál, arguidu deklara katak nia kaer duni lezada nia liman kabun hosi sorin karuk maibé laos dulas no la haree lezada oin halai, arguidu ho lezada kona hotu didin lolon no la haree lezada nia kanotak baku iha didin, so haree deit lezada nia ain tur kona iha rai. Depoizde tribunál konfirma ho lezada, lezada deklara katak mantein ho akuzasaun ministériu públiku nian.

Iha alegasaun finál, ministériu públiku haktuir katak, atu halo prevensaun jerál ba krime violénsia doméstika iha uma laran, husu ba tribunál atu kondena arguidu ho pena prizaun tinan 1 suspende ba tinan 1 fulan 6. Enkuantu defeza husu ba tribunál atu fó justisa ba arguidu.

Depoizde avalia faktus provadus sira ne`ebé produz durante julgamentu, tribunál konklui prosesu ne`e no kondena arguidu ho pena prizaun tinan 1 suspende ba tinan 2.

11. Krime ofensa ba integridade fizika simples ho forma violénsia doméstika

Nú. Prosesu : 164/krime/2015/TDO.
Kompozisaun tribunál : Singular
Juis : Dr. João Ribeiro
Ministériu Públiku : Dra. Ambrosio Rangel Freitas
Defeza : Dr. Afonso Gomes Fatima (defensória públiku)
Tipu desizaun : Kondena arguidu ho pena prizaun tinan 1 fulan 6 suspende ba tinan 2.

Iha 28 Outubru 2015, Tribunál Distritál Oe-cusse julga krime violénsia doméstika ne`ebé komete husi arguidu QT hasoru nia feen, iha Distritu Oe-cusse.

Ministériu Públiku akuza katak iha 10 Jullu 2015, maizumenus iha tuku 21.00 kalan, arguidu ho lezada diskuti malu tanba lezada la tuir arguidu ba natar hodi dulas hare. Nune`e arguidu buti lezada nia kakorok, soe etu ho bikan iha lezada nia oin no riba lezada ba iha rai. Aktu hirak ne`e rezulta lezada sofre moras, bubu no mean iha nia isin.

Akontesementu segundu, lezada halai ba nia subriña nia uma, arguidu duni tuir no buti tan dala ida iha kakorok. Depoisde ne`e arguidu kontinua foti kadeira masa ne`e hodi baku iha lezada nia ulun no dala ida iha kanuruk.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho Lei Kontra Violénsia Doméstika. Kazu ne`e hetan relatóriu médiku husi Pradet.

Iha tribunál, arguidu deklara katak akuzasaun husi ministériu públiku balu los no balu la los. Arguidu deklara katak nia buti duni lezada nia kakorok maibé la soe etu iha bikan ba lezada nia isin, la riba lezada ba iha rai tanba sira dudu malu, arguidu lori kadeira masa baku deit iha ulun maibé la baku iha kanuruk. Arguidu deklara katak nia arepende ona nia hahalok, seidauk dame malu tanba lezada hela iha nia inan aman nia uma. Depoisde konfirma ho lezada nafatin maintein ho akuzasaun husi ministériu públiku.

Iha alegasaun finál ministériu públiku hare ba sirkunstansia ne`ebé mak hatodan no hakmaan arguidu. Tanba ne`e husu ba tribunál atu kondena arguidu ho pena prizaun tinan 2 suspende ba tinan 2 fulan 6. Enkuantu defeza husu atu fó justisa ba arguidu.

Depoisde avalia faktus provadus sira ne`ebé produz durante julgamentu, tribunál konklui prosesu ne`e no kondena arguidu ho pena prizaun tinan 1 fulan 6 suspende ba tinan 2.

Atu hetan informasaun kle'an favor kontaktu direitamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org
Telefone: 3323883/77295795

Rua setubal, Colmera, Dili Timor Leste
PoBox: 275
Telefone: 3323883 |77295795
www.jsmp.tl
info@jsmp.minihub.org
Facebook: www.facebook.com/timorleste.jsmp
Twitter: @JSMPtl